

# Naomh Éanna

## Ceist 1

Beidh tú ag féachaint ar ball ar thuairisc faoi chinniúint na loinge *Naomh Éanna*. Sula bhféachfaidh tú ar an tuairisc, pléigh brí na bhfocal agus na bhfrásaí seo leis an duine in aice leat:

socrú  
imithe i léig  
a thabhairt slán  
bád farantóireachta agus lastais  
lonnaithe  
casadh i scéal an bháid  
duga  
a thabhairt chun críche  
ar bhonn sealadach  
Uiscebhealaí Éireann



## Ceist 2

Féach ar an mír anois agus bain úsáid as na focail agus na frásaí thuas chun na bearnaí a líonadh sa script.

### Eimear Ní Chonaola

Tá sé curtha in iúl ag NAMA do Nuacht TG4, go bhfuil an \_\_\_\_\_ a bhí acu le húnéirí an tseanbháid an *Naomh Éanna*, maidir le hí a choinneáil ar ché dá gcuid i mBaile Átha Cliath, \_\_\_\_\_ ó 2019. Bhí feachtas ar bun le roinnt blianta, ag iarraidh an bád farantóireachta a bhíodh ag freastal ar Oileán Árann, \_\_\_\_\_. Ach, deir lucht an fheachtais inniu, nach bhfuil aon mhaith déanta.

### Áine Lally

Tá stair mhór ag baint leis an *Naomh Éanna*, mar gur chaith sí breis is tríocha bliain ina \_\_\_\_\_ idir Gaillimh agus Árainn ó dheireadh na gcaogaidí. Os cionn ceithre bliana ó shin, chuir Sam Field Corbett agus grúpa tacaíochta an tseanbháid, feachtas ar bun ag iarraidh í a thabhairt slán óna titim. Le linn an ama seo, leagadh amach trí phlean déag gnó ina raibh sé i gceist obair mhór a dhéanamh uirthi. I measc na bpleananna sin, bhí sé i gceist músaem, óstán agus caifé a dhéanamh di, agus bhí súil go mbeadh sí \_\_\_\_\_ i nGaillimh.

Is iomaí \_\_\_\_\_ seo ó cuireadh feachtas ar bun chun í a shábháil. Is i n\_\_\_\_\_ na Canálach Móire sa bpríomhchathair atá sí inniu.

### Micheál Ó Cionna, 'Killary Fjord Boat Tours' agus Grúpa Tacaíochta *Naomh Éanna*

Faraor, tá an chosúlacht ann go bhfuil deireadh tagtha leis an *Naomh Éanna* ag an bpointe seo. Chaith Sam Corbett ceithre nó cúig de bhlianta ag iarraidh an long a shábháil, agus bhí mise ag cabhrú leis, leis an bplean a bhí aige í a thabhairt siar anseo go Gaillimh, le bheith lonnaithe thíos sa seanduga ansin, i lár Chathair na Gaillimhe. Ach, is cosúil nach bhfuil aon am fágtha le hí a shábháil agus ní raibh muid in ann sa deireadh dóthain airgid a chur le chéile chun an togra \_\_\_\_\_.

### Áine Lally

Thug NAMA le fios do Nuacht TG4 inniu, nach leo an *Naomh Éanna* ach gur leo an áit ina bhfuil sí anois. In 2015, tugadh cead d'úinéirí an bháid suíomh NAMA a úsáid \_\_\_\_\_. Tá an comhaontú sin imithe i léig ó 2019. Faoi láthair, tá NAMA, a deir siad, mar aon le h\_\_\_\_\_ ag féachaint ar na roghanna atá acu anois maidir leis an suíomh.

**Ceist 3** Féach ar an tuairisc arís. An bhfuil na ráitis seo fíor nó bréagach?

1. Tá an long *Naomh Éanna* in iarthar na tíre faoi láthair.
2. Chaith an *Naomh Éanna* 30 bliain ag dul ó Ghailimh go dtí Árainn agus ar ais.
3. Is é Sam Field Corbett úinéir na loinge.
4. Bhí sé i gceist bialann ardnósach a dhéanamh den bhád.
5. Bhailigh an grúpa tacaíochta go leor airgid chun an togra a fhorbairt.
6. Is le NAMA anois an *Naomh Éanna*.

**Ceist 4** An séimhiú

Tá an séimhiú in easnamh i ngach sampla thíos. Líon isteach é san áit cheart agus abair cén fáth a bhfuil sé ann. Pléigh do chuid freagraí le cinn an duine in aice leat.

- lucht an feachtais
- aon maith déanta
- stair mór
- ó deireadh
- trí pleán déag
- obair mór
- ar bonn sealadach
- uiscebealaí

**Ceist 5** 'Caol le caol agus leathan le leathan'

Críochnaigh na hainmfhocail seo a bhí le cloisteáil sa tuairisc. Tá an chéad cheann déanta duit.

farantóir_____	= farantóireacht
úin_____	=
tacaí_____	=
cas_____	=
cuir_____	=
deir_____	=

**Ceist 6** Pléigh na ceisteanna seo le do ghrúpa:

1. Ar chaith tú seal ar aon oileán amach ó chósta na hÉireann? Déan cur síos ar an eispéireas sin.

2. Cén tábhacht a bhaineann le long ar nós *Naomh Éanna* a athchóiriú agus a chaomhnú, dar leat?

## Treoracha agus Freagraí

### Ceist 1

1. <i>socrú</i>	arrangement
2. <i>imithe i léig</i>	lapsed
3. <i>a thabhairt slán</i>	to save
4. <i>bád farantóireachta agus lastais</i>	ferry and cargo boat
5. <i>lonnaithe</i>	situated
6. <i>casadh i scéal an bháid</i>	twist in the boat's story
7. <i>duga</i>	dock
8. <i>a thabhairt chun críche</i>	to finalise
9. <i>ar bhonn sealadach</i>	temporarily
10. <i>Uiscebhealaí Éireann</i>	Waterways Ireland

### Ceist 2

Féach an script.

### Ceist 3

1. Bréagach. Tá sí in oirthear na tíre, i mBaile Átha Cliath.
2. Fíor.
3. Ní deirtear.
4. Bréagach. Bhí sé i gceist músaem, óstán agus caifé a dhéanamh den bhád.
5. Bréagach.
6. Bréagach. Is le NAMA anois an áit ina bhfuil *Naomh Éanna*.

### Ceist 4

lucht an **fh**eachtais: Séimhítear ainmfhocal firinscneach sa tuiseal ginideach uatha tar éis an ailt (ach amháin má thosaíonn an t-ainmfhocal ar d, t ná s).

aon **mh**aith déanta: Séimhítear an t-ainmfhocal tar éis an fhocail 'aon' (ach amháin má thosaíonn an t-ainmfhocal ar d, t ná s).

stair **mh**ór: Séimhítear an aidiacht tar éis ainmfhocal baininscneach.

ó **dh**eireadh: Séimhítear an t-ainmfhocal tar éis an réamhfhocail shimplí 'ó'.

trí **ph**lean déag: Séimhítear an t-ainmfhocal tar éis na huimhreach 'trí'.

obair **mh**ór: Séimhítear an aidiacht tar éis ainmfhocal baininscneach.

ar **bh**onn sealadach: Séimhítear an t-ainmfhocal tar éis an réamhfhocail shimplí 'ar', nuair nach gcuirtear staid nó suíomh in iúl.

uisceb**h**ealaí: Nuair a thagann dhá fhocal le chéile chun comhfhocal a chruthú, cuirtear séimhiú ar an dara focal (ach amháin nuair a thagann *d, t, l, s* ná *n* le chéile).

### Ceist 5

farantóir_____	= farantóire <u>acht</u>
úin_____	= úin <u>éir</u>
tacaí_____	= taca <u>íocht</u>
cas_____	= cas <u>adh</u>
cuir_____	= cuire <u>adh</u>
deir_____	= deire <u>adh</u>

### Ceist 6

Is féidir na foghlaimeoirí a chur ag plé na gceisteanna seo i mbeirteanna nó i ngrúpaí de thriúr nó de cheathrar.

**Eimear Ní Chonaola**

Tá sé curtha in iúl ag NAMA do Nuacht TG4, go bhfuil an socrú a bhí acu le húinéirí an tseanbháid an *Naomh Éanna*, maidir le hí a choinneáil ar ché dá gcuid i mBaile Átha Cliath, imithe i léig ó 2019. Bhí feachtas ar bun le roinnt blianta, ag iarraidh an bád farantóireachta a bhíodh ag freastal ar Oileán Árann, a thabhairt slán. Ach, deir lucht an fheachtais inniu, nach bhfuil aon mhaith déanta.

**Áine Lally**

Tá stair mhór ag baint leis an *Naomh Éanna*, mar gur chaith sí breis is tríocha bliain ina bád farantóireachta agus lastais idir Gaillimh agus Árainn ó dheireadh na gcaogaidí. Os cionn ceithre bliana ó shin, chuir Sam Field Corbett agus grúpa tacaíochta an tseanbháid, feachtas ar bun ag iarraidh í a thabhairt slán óna titim. Le linn an ama seo, leagadh amach trí phlean déag gnó ina raibh sé i gceist obair mhór a dhéanamh uirthi. I measc na bpleananna sin, bhí sé i gceist músaem, óstán agus caifé a dhéanamh di, agus bhí súil go mbeadh sí lonnaithe i nGaillimh.

Is iomaí casadh i scéal an bháid seo ó cuireadh feachtas ar bun chun í a shábháil. Is i nduga na Canálach Móire sa bpríomhchathair atá sí inniu.

**Micheál Ó Cionna, 'Killary Fjord Boat Tours' agus Grúpa Tacaíochta *Naomh Éanna***

Faraor, tá an chosúlacht ann go bhfuil deireadh tagtha leis an *Naomh Éanna* ag an bpointe seo. Chaith Sam Corbett ceithre nó cúig de bhlianta ag iarraidh an long a shábháil, agus bhí mise ag cabhrú leis, leis an bplean a bhí aige í a thabhairt siar anseo go Gaillimh, le bheith lonnaithe thíos sa seanduga ansin, i lár Chathair na Gaillimhe. Ach, is cosúil nach bhfuil aon am fágtha le hí a shábháil agus ní raibh muid in ann sa deireadh dóthain airgid a chur le chéile chun an togra a thabhairt chun críche.

**Áine Lally**

Thug NAMA le fios do Nuacht TG4 inniu, nach leo an *Naomh Éanna* ach gur leo an áit ina bhfuil sí anois. In 2015, tugadh cead d'úinéirí an bháid suíomh NAMA a úsáid ar bhonn sealadach. Tá an comhaontú sin imithe i léig ó 2019. Faoi láthair, tá NAMA, a deir siad, mar aon le hUiscebhealaí Éireann ag féachaint ar na roghanna atá acu anois maidir leis an suíomh.

Áine Lally, Nuacht TG4.